

आकाशवाणी

खबरां -----

1. प्रधानमंत्री होर नमीं दिल्ली च नीति आयोग दी गवर्निंग कौंसल दी बैठक दी अध्यक्षता करा'रदे न जेदे च देश दी विकास सरबन्धी चुनौतिएं पर विचार होआ'रदा ऐ।
2. भारत नै आतंकवाद खिलाफ सख्त संदेश दिंदे होई कई देशें च प्रतिनिधिमंडल भेजे न। डी.एम.के सांसद कानीमोई हुंदी अध्यक्षता च सर्वदलीय डेलीगेशन रूस पुजेआ।
3. संयुक्त राष्ट्र सुरक्षा परिषद च भारत नै कई दशकें थमां बन्ने पारा दा चलाए जा'रदे आतंकवाद लेई पाकिस्तान दी सख्त शब्दें च निंदेआ कीती ऐ।
4. विदेश मंत्री डॉ. एस जयशंकर होरें जर्मनी आसेआ भारत दी आतंकवाद खिलाफ लड़ाई ते आत्मरक्षा दे भारत दे अधिकार दा समर्थन करने लेई ओहदा धन्नवाद कीता ऐ।
5. बैडमिंटन च भारत दे किदंबी श्रीकांत नै मलेशिया मास्टर्ज टूर्नामेंट दे फाइनल च प्रवेश पाई लैता ऐ।
6. क्रिकेट च इंग्लैंड दे दौरे पर जाने आहली टीम दी बी.सी.सी.आई नै घोषणा कीती, शुभमन गिल गी टीम दा कप्तान बनाया गेआ।

<><><><><><>

प्रधानमंत्री नरेंद्र मोदी होंरें राज्यें गी आखेआ ऐ जे ओहू वैश्विक स्तर दी घट्टोघट्ट 1 सैलसफे आहली थाहर विकसित करन जेदे कन्नै सारी जरूरी स्थूलतां इक्के राज्य च उपलब्ध कराई जान यानि One State One Global Destination । नीति आयोग दी गवर्निंग काउंसल दी 10मीं बैठक दी नमीं दिल्ली च अध्यक्षता करदे होई प्रधानमंत्री होंरें जोर देइयै आखेआ जे इस पहल कन्नै सैलसफा आहली थाहरें दे कन्नै लगदे शहरें दा बी विकास होग। प्रधानमंत्री होंरें आखेआ जे भारत दा बल्ले-बल्ले शहरीकरण होआ'रदा ऐ ते जेकर केंद्र ते सारे राज्य किट्टै रलिए टीम इंडिया आहला लेखा कम्म करन ते किश बी हासल करना नामुमकिन नेई ऐ। मुख्मन्त्री उमर अब्दुल्ला होर बी नीति आयोग दी बैठक च मौजूद हे। एहदे शा पैहले इक सोशल मीडिया पोस्ट च अब्दुल्ला होंरें आखेआ हा जे ओहू जम्मू-कश्मीर दे विकास सरबन्धी प्राथमिकता ते चिंताएं गी उजागर करनडन ते जम्मू-कश्मीर दे हालातें ते समावेशी विकास गी ध्यान च रखदे होई बादू सहायता दी हिमायत करडन।

<><><><><><>

Delhi-CM Niti Aayog

दिल्ली दी मुख्मन्त्री रेखा गुप्ता होंरें अज्ज नमीं दिल्ली दे भारत मंडपम च आयोजित नीति आयोग दी गवर्निंग काउंसिल दी बैठका च हिस्सा लैता। बैठक मगरा मीडिया कन्नै गल्लबात करदे होई मुख्मन्त्री होंरें दस्सेआ जे बैठक च दिल्ली कन्नै सरबन्धत केई सारे विशें पर सकारात्मक चर्चा होई जिं'दे च हर घर नल से जल, जमुना नदी दी सफाई ज्नेहू विशे प्रमुख रूप कन्नै शामिल हे। पर्यटन दे सरबन्धे च इक सोआल दा परता दिं'दे होई श्रीमती गुप्ता होंरें गलाया जे दिल्ली सरकार राष्ट्रीय राजधानी च इक नमां टूरिस्ट सर्किट बनाने दा कम्म करै करदी ऐ तांजे दिल्ली च घुम्मन औने आहले सैलानियें गी नमीं नमीं जगहां घुम्मने गी मिलन। बैठक च शामिल होने थमां पैहले इक सोशल मीडिया पोस्ट च मुख्मन्त्री होंरें दस्सेआ जे पिच्छली गैर जिम्मेदार सरकारें दे आचरण करी, दिल्ली दे अधिकार दी गल्ल आयोग दी बैठक च नेई रक्खी जा करदी ही। उंनें आखेआ जे दिल्ली गी विकसित दिल्ली बनाने आस्तै प्रतिबद्ध दिल्ली सरकार, प्रधानमंत्री नरेंद्र मोदी हुंदी अध्यक्षता च आयोजित इस महत्वपूर्ण बैठक च विकसित भारत लेई विकसित दिल्ली दा अपना रोडमैप, देश दे सब्भनें प्रदेशें दे मुखियाएं दे अग्गे पेश करोग।



PM-MKB

प्रधानमंत्री नरेन्द्र मोदी होर कल ऐतवारें 25 मई गी आकाशवाणी पर प्रसारित होने आहले अपने महावार रेडियो कार्यक्रम “मन की बात” राए देश विदेश च रोहने आहले लोकें कन्ने अपने विचार सांझे करडन। हर म्हीने दे अखीरले ऐतवार प्रसारित होने आहले इस कार्जक्रम दी एहू 122मीं कडी होग। एहू कार्जक्रम कल दिनै 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहूदे कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे तुरत मगरा आकाशवाणी जम्मू पर एहूदा डोगरी भाषा च अनुवाद प्रसारित कीता जाग। एहूदा डोगरी अनुवाद तुस रातीं 8 बजे इक बारी परतियै आकाशवाणी जम्मू पर सुनी सकदे हो।



MoS-Healthcare

सेहत ते परौआर कल्याण राज्यमंत्री अनुप्रिया पटेल होरें आखेआ ऐ जे राज्य सरकारें गी सस्ती ते बढिया सेहत स्हूलतें दी दस्याबी आस्तै केंद्र नै म्हेशां सहयोग कीता। केंद्री मंत्री होर अज्ज बनीं दिल्ली च राइजिंग नार्थ ईस्ट निवेशक सम्मेलन दौरान मीडिया गी संबोधित करा'रदी हियां।



Hajj Pilgrims

हज जात्तरा पर जाने आहले भारतीयें भारत सरकार तरफा कीते गेदे इंतजामें दी तरीफ कीती ऐ जेदे कन्नै उंदा साउदी अरब च सफर असान ते अरामदायक होई गेआ ऐ। अल्पसंख्यक मंत्रालय नै ‘एक्स’

पर पोस्ट कीता ऐ जे एह मंत्रालय दी लगातार कोश्ट रेई ऐ जे हर हज यात्री गी अरामदायक ते
सहूलतें सने जात्तरा तजुर्बा होऐ।

<><><><><><>

Add-All Party Delegation

रूस दे दौरे पर गेदे भारत दे सर्वदलीय शिष्टमंडल नै आतंकवाद गी बिंद बी बर्दाश्त नेई करने दे भारत
दे सख्त रौं उजागर कीता। मास्को च भारतीय दूतावास च इक सांझे पत्रकार सम्मेलन गी संबोधित
करदे होई भारती डेलीगेशन दी अध्यक्ष, डीएमके सांसद कानीमोई होरें आखेआ जे पहलगाम
आतंकवादी हमला पाकिस्तान थमां आए दे आतंकवादिगं कीता। उनें आखेआ जे जिस आतंकवादी
संगठन नै इस हत्याकांड दी जिम्मेदारी लैती, ओदा बचाव पाकिस्तान नै संयुक्त राष्ट्र सुरक्षा परिषद
च कीता। उनें आखेआ जे भारत नै जिम्मेदारी कन्नै प्रतिक्रिया दिती ऐ नागरिक ते फौजी ठिकानें गी
नुकसान पुजाए बिजन पाकिस्तान दे आतंकवादी ठिकानें गी निशाना बनाया।

<><><><><><>

APD

बीजेपी सांसद बेजन्त पांडा हुंदी अध्यक्षता च सर्वदलीय प्रतिनिधिमंडल अज्ज बहरीन पुज्जेआ। इस
दौरे दा मकसद भारत दी आतंकवाद गी बिंद बी बर्दाश्त नेई करने दी नीति गी सांझा करना ऐ।
प्रतिनिधिमंडल, अंतरराष्ट्रीय आतंकवाद खिलाफ अपने नजरिए गी उजागर करोग। एह
प्रतिनिधिमंडल साउदी अरब, कुवैत ते अल्जीरिया बी जाग। दुआ प्रतिनिधिमंडल कांग्रेस सांसद शशि
थरूर हुंदी अध्यक्षता च अज्ज बडुलै सवेला दिल्ली थमां रवाना होआ। एह प्रतिनिधिमंडल 5 देशें दा
दौरा करोग। सब्बनें शा पैहले एह प्रतिनिधिमंडल गुआना पुज्जोग, ओदे मगरा अमरीका, पनामा,
ब्राजील ते कोलंबिया दा दौरा करोग। अपने दौरे शा पैहले थरूर होरें सोशल मीडिया पर वीडियो
संदेश जारी कीता जेदे च भारत दा आतंकवाद खिलाफ सख्त रौं दस्सेआ गेआ। तोआई इक होर
सर्वदलीय प्रतिनिधिमंडल जनता दल यूनाइटेड सांसद संजय झा हुंदी अध्यक्षता च जपान पुज्जेआ ते

उत्थे भारती नागरिकें कन्नै मलाटी कीती। भारतीय समुदाय गी संबोधित करदे होई झा होरें भारत दा इकजुट रूप पेश कीता ते 22 अप्रैल गी पहलगाम च होए दे आतंकी हमले च पाकिस्तान दी भूमिका गी साफ-साफ समझाया।

<><><><><><>

India-UNSC

संयुक्त राष्ट्र सुरक्षा परिषद च भारत नै सख्त शब्दें च पाकिस्तान दी आलोचना कीती ऐ ते दशकें थमां बन्ने पारा दा कीते जा'रदे आतंकवादी हमलें गी उजागर कीता ऐ। संयुक्त राष्ट्र च भारत दे स्थाई प्रतिनिधि पी. हरीश होरें इक खुली बैहस च पाकिस्तान पर आरोप लाया जे उन्नै सिविल नागरिकें गी ढाल बनाइयै आतंकवादिणं दा बचाव कीता ते दुनिया नै दिक्खी लैता ऐ जे आपरेशन सिंदूर दौरान मारे गेदे आतंकवादिणं गी पाकिस्तानी नागरिकें श्रद्धांजलि दिती ही। उनें पाकिस्तान आसेआ भारत दे सीमावर्ती इलाकें च सिविल लोकें गी निशाना बनाइयै कीते गेदे हमलें दी निंदेआ कीती ते 26/11 आहले मुम्बई आतंकी हमले ते अप्रैल 2025 आहले पहलगाम आतंकवादी हमले च पाकिस्तान दी भूमिका गी उजागर कीता। उनें आखेआ जे आतंकवादिणं ते नागरिकें गी बराबर दस्सने आहले मुलखै गी नागरिक सुरक्षा दी गल्ल करने दा कोई अधिकार नेई ऐ।

<><><><><><>

LoP-Poonch

कांग्रेस दे सीनियर लीडर ते लोकसभा च विपक्ष दे नेता राहुल गांधी होरें अज्ज पुंछ दा दौरा कीता ते पिछले दिने बन्ने पारा पाकिस्तानी गोलीबारी करी प्रभावित परिवारें कन्नै मिले। जम्मू-कश्मीर सरकार दे मंत्री जावेद राणा होर बी उन्दे कन्नै हे। दौरे दौरान राहुल गांधी होरें गोलीबारी करी

नुकसान पुज्जी दिएं थाहरें दा बी दौरा कीता। उनें गोलीबारी च मारे गेदे लोकें दे परोआर आहलें कन्नै दिली हमदर्दी प्रगट कीती ते उनेंगी हर चाल्ली दे सहयोग ते समर्थन दा यकीन दोआया। गोलीबारी च होई दी तबाही पर रौह प्रगट करदे होई प्रभावितें गी तौले राहत ते मुआवजा देने दी मंग कीती ते आखेआ जे ओहू इस मुद्दे गी संसद च पूरी तगड़ेयाई कन्नै पुट्टुडन।

<><><><><><>

EAM-Germany

विदेश मंत्री डॉ. एस. जयशंकर होरें जर्मनी आसेआ भारत दी आतंकवाद खिलाफ लड़ाई दा समर्थन करने लेई धन्नवाद कीता ऐ। बर्लिन च जर्मनी दी विदेश मामलें दी कौंसल कन्नै गल्लबात च डॉ. जयशंकर होरें भारत दे आत्मरक्षा करने, अपने लोकें दी हिफाजत करने ते देश गी सुरक्षित करने दे अपने अधिकार गी पक्का कीता ते आखेआ जे जर्मनी सने दुनिया दे मते सारे देश एहदे कन्नै सहमति होंगन। आपरेशन सिंदूर पर बोलदे होई विदेश मंत्री होरें आखेआ जे भारत दा अभियान आतंकवाद दे खिलाफ ऐ ते असें आतंक दे हेडक्वार्टरें गी निशाना बनाया ऐ ते इस अभियान च अंतरराष्ट्री सहमति हासिल करदे होई कार्रवाई कीती ऐ।

<><><><><><>

BSF-Pakistan Intruder

सीमा सुरक्षा बल नै कल रातीं गुजरात दे बानस्कंठा जिले च घुसपैठ करिए भारत दी सीमा च दाखल होने दी कोशिश गी नाकाम करदे होई 1 घुसपैठिए गी मारी मकाया ऐ। इक बयान च सीमा सुरक्षा बल नै आखेआ ऐ जे उन्दे जवानें बन्ने कश इक संदिग्ध नक्लोहरकत गी अंतरराष्ट्री बन्ने गी पार करियै इस भेठा बददे दिक्खेआ। बीएसएफ जवानें घुसपैठिए गी चेतावनी दिती पर ओहू बददा रेआ जिसी करी गोली चलानी पेई। मौके पर गै घुसपैठिए दी मौत होई गई।

<><><><><><>

Naxalites

झारखंड ते लातेहार जिले च कल रातीं पोलीस कन्नै टाकरे च त्रै नकसलवादी मारे गे जिंदे च खतरनाक माओवादी नेता पप्पू लोहारा बी ऐ हा। ओह झारखंड जनमुक्ति परिषद नां दे इक संगठन दा सरगना बी हा ते ओदे पर 10 लक्ख रुपें दा ईनाम बी हा।

<><><><><><>

Badminton

बैडमिंटन च भारत दे उच्च स्तर दे खडारी किदंबी रीकांत होरें कुआला लप्पुर च खेड्डी जारदी मलेशिया मास्टर्ज टूर्नामेंट दे पुरुष एकल फाइनल च प्रवेश पाई लैता ऐ। श्रीकांत नै जपान दे Yushi Tanaka गी अज्ज बडुलै खेड्डें दे सेमीफाइनल च हराया। इस जित्त कन्नै किदंबी श्रीकांत इस बरे फाइनल च पुज्जने आहला भारत दा पैहला शटलर बनी गेआ ऐ।

<><><><><><>

India Test Squad

भारतीय क्रिकेट कंट्रोल बोर्ड नै औदे इंग्लैंड दौरे दरान खेड्डी जाने आहली 5 टेस्ट मैचें दी श्रृंखला लेई भारती टीम दी घोषणा करी दित्ती ऐ। शुभमन गिल होरें'गी टीम दा कप्तान बनाया गेआ ऐ, जदके ऋषभ पंत उपकप्तान दी भूमिका निभाडन। विराट कोहली ते रोहित शर्मा हुं'दे टेस्ट क्रिकेट थमां संन्यास लेई लैने परैन्त भारती टीम पैहली टेस्ट क्रिकेट श्रृंखला खेड्डुन जा'रदी ऐ। भारती टीम च करूण नाय्यर ते बी. साई सुदर्शन गी बी थाह दित्ती गई ऐ। इंदे अलावा यशस्वी जयसवाल, के.एल. राहुल, अभिमन्यु ईश्वरन, नितिश रेड्डी, रविन्द्र जडेजा, ध्रुव जुरेल, वाशिंगटन सुंदर, शारदुल ठाकुर, जसप्रीत बुमराह, मोहम्मद सिराज, प्रसिद्ध कृष्णा, आकाशदीप, अर्शदीप सिंह ते कुलदीप यादव टीम दा हिस्सा ना।

<><><><><><>

Weather

दक्खन पच्छमी मानसून अज्ज केरल च पुज्जी गेआ जेडा गै निर्धारित समें यानि 1 जून थमां 8 दिन पैहले गै आई गेआ। पिछले 16 बरें च इस बारी सब्बनें शा पहले मानसून नै केरल च दस्तक दिती ऐ। इस बारै घोषणा करदे होई मौसम विभाग नै आखेआ जे साल 2009 दे बाद इस बारी मानसून तौले गै आई गेआ। केरल च लगातार भारी बरखा दे चलदे कन्नौर ते कासारगोड जिलें च रेड अलर्ट जारी करी दिता गेआ ऐ। लक्षद्वीप दे जिलें च ओरेंज अलर्ट ते 3 जिलें च येलो अलर्ट जारी कीता गेआ ऐ। भारी बरखा दे चलदे राज्य दी सैलसफा आहली थाहरें पर आने जाने दी पाबंदी लाई गई ऐ। बक्ख करी खरा-मता नुकसान होने दी खबर थहोई ऐ। मते थाहरें पर गड्डिणं दी आओजाई ते बिजली आपूर्ति बी प्रभावित होई ऐं खरी मती बरखा होने करी 2 मौतां बी हाइयां ना। तोआई, महाराष्ट्र दे बी किश जिलें च लगातार बरखा बरा'रदी ऐ। मौसम विभाग नै 2 जिलें च रेड अलर्ट ते 7 जिलें च ओरेंज अलर्ट जारी कीता ऐ।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 ब'रें दे बश्कार ऐ ते ओहू कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद् दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15

जून 2025 थवां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>